

Tinjisits uaspits, tinjisits sh-duruts Armânji,

Ghini vinitu sh-ghini ni-aflămu la aestă andamusi, la prota Conferintsă a Consillui Armânjiloru (Makedonarmânjiloru).

Tu-ahurhită, tu numa a Consillui Armânjiloru (Makedonarmânjiloru) voiu s-vă hâristusescu câ aflatu chiro sh-câ featsitu copusu tra s-yinits la aestă andamusi.

Cumu shtits, ditu hâbărli tsi li pitreatsi Biroulu di Cumândăseari pritu bulitinili infurmativi sâlghiti mesualu câtă mass-media armânească, adză prindea s-dizvârtească Protlu Congresu Internatsionalu Armânescu, andreptu di Consillu Armânjiloru (Makedonarmânjiloru) deadunu cu alti organizatsiuni internatsionali cumu Convivenza, FUEN, câtă cumu sh-cu andrupâmintulu a Consillui ali Evropă. Cumu aghenda di lucru a Prezidentului a CE, Lluís Maria de Puig s-alăxi sh-cumu nu vreamu s-adrămu aestu congresu fărâ atselu cari andreapsi Raportulu tsi fu thimeljiu tră Dimândarea 1333, minuimu câ easti ghini s-lu-amănămu până di prumveară.

Aestu congresu lipseashti s-ascoată tu miydhani unitatea armânjiloru di iutsido, a s-hibă câ isturia lj-ampârtsă sh-bâneadză ampârtsâts di dzatsdianji, sh-cama multu, vremu s-ascutem tu miydhani câ **himu deadunu** – atsea ti vremu s-aspunemu a uaspitsloru xenji tsi va hibă câlisits.

Easti atsea tsi vremu s- duchimu adză, deadunu, la aestă conferintsă, vruts sh-duruts Armânji !

Tr-aestu scupo, acljimămu la aestă conferintsă, tuti sutsatili armâneshtsă, cama di shaptidzăts, nu mashi atseali tsi chiola suntu tu Consilu, fărâ s-lomu tu isapi dheaforaua tu mindueari andicra di problematica armânească.

Vremu s-nă cânushtemu minduearea un-alantu, vremu s-nă cânushtemu duchearea un-alantu, sh-nu dipu tu soni, vremu s-anvitsămu desi deadunu putemu s-anchisimu pi idyia cali ti idyiulu sinferu ică scupo: avigljiaarea a identitatiljei alushtui populu reghionalu a curi limbă shi cultură , di cama di 2000 di anji, sh-au zârtsina tu-atseali dauă culturi cari adză definescu Evropa: **cultura elină shi cultura latină.**

“Cari himu, di iu himu, di cându himu?” – dzâsi unu sotsu – suntu, dealihea, mashi ndauâ ntribări ama suntu ntribări tsi multu frimitâ mintea bârnuriloru di tiniri di adzâ, sh-nu mashi, tu-aeshtsâ ditu soni anji. S-hibâ aestâ câftari ună crizâ di identitati, icâ vahi easti mashi unu hiru tsi-azvoami ditu duchearea individualâ?

Noi shtimu cari himu, noi shtimu di iu himu, noi shtimu di cându himu, sh-câftâmu aestâ pricânushteari.

Andamusea di adzâ vremu s-hibâ unu semnu trâ UNITATEA armânjiloru cari caftâ pricânushteara popului a nostru ca populu vecljiu, autohtonu, cu limba sh-cultura a lui ahoryea.

Nu mata putemu s-astrâximu s-videmu cumu unitatea noastâ easti mâtsinatâ sh-anchidicatâ di sinferili a niscântoru tsercljiuri ultranatsiunalisti ditu craturli iu bânămu, tsi nica suntu sclayi ali unâ idheoloyii cari di multu ascâpitâ. Identitatea nu easti unâ tsertificari tsi prindi s-astrâxeascâ vula icâ simnâtorlu di la unâ academie. Identitatea easti dukeari ! Cathi unu di noi ari ndreptulu sâ-sh dzâcâ câ easti atsea tsi dukeashti. Identitatea easti dukeari, easti dukearea tsi lipseashti s-hibâ tinjisitâ. Aestâ easti noima evropeanâ di adzâ, cu-aestâ noimâ evropeanâ s-thimiljiusi aoa sh-patru anji aestu consilu tsi adzâ ari ti prota oară haraua mari câ ne-aflămu DEADUNU !

S-vâ amu hârioshi !